

# LA USC DI LADINS - VENERDI' 3 LUGLIO 2020

UNIVERSITÉ

## Conferma por Paul Videsott

*Le prof. de romanistica Paul Videsott restará ince por i proscims trëi agn degan dla Facolté de Sciënzes dla Formaziun tla unibz. I ti un damané ci proiec che al á, ince por la seziun ladina*

Dis de nominaziuns y confermes por la Universitè Lèdia de Balsan. En vëndres dan otedé á le Consèi d'Universitè nominé i degans nūs de trëi facoltés. Óna de chëstes é la Facolté de Sciënzes dla Formaziun

a Porsenú, olache le professor de romanistica y diretor dla repartiziun ladina Paul Videsott é gnü reconfermé te súa inciaria por i proscims trëi agn. Nūs é indere le prof. Marco Gobbetti a ce dla Facolté de Sciënzes Naturales y Tecnica, y le prof. Claus Pahl a ce dla Facolté de Informatica. Les inciaries pëia ia ofizialmënter cun le 1. d'otober 2020.

— *Và inant a plata 3*



Le prof. Paul Videsott resta inant degan dla Facolté de Sciënzes dla Formaziun tla unibz.

— *và inant da la prima plata*

## Conferma por Paul Videsott

*Le prof. de romanistica Paul Videsott restará ince por i proscims trèi agn degan dla Facolté de Sciënzes dla Formaziun tla unibz. I ti un damané ci proiec che al á, ince por la seziun ladina*

Cun Paul Videsott, che á la responsabilitá dla maiú Facolté dla Università Lèdia de Balsan, se l'unse cuntada plü avisa. I ti un damané ci che al á podü arjunje te chësc pröm mandat, co che le «coronavirus» á condizioné l'insegnamënt y la vita universitara, y ci che al se tol dant por i agn che vëgn, en particular por la seziun ladina.

**La Usc Prof. Videsott, i sèis gnü reconfermá a ce dla Facolté de Sciënzes dla Formaziun. Ciun é pa Osc bilanz de chisc pröms trèi agn, ci Èise pa podü arjunje?**

*Paul Videsott* Imprömadedöt mëssi dí che chisc trèi agn s'un é jorá, mo al é sté n tēp dēr intensif. Danter les gran sodesfaziuns de chisc agn alda sigü che i un reorganisé la Facolté, cherian arees de archirida nöies, olache i sun passá da trèi a

set. I un spo cherié «cluster», che é grups de laur danter professurs dl medem setur scientifich. Cun èi ái porvé da superé n pü' la divijiun linguistica danter professurs todësc y professurs taliagn. Ió sun dla minunga che sce an laora tl medem setur, desson lauré adöm, sura i lingac fora.

N gran vare é sté chël da implementé i cursc de stüde che i un reformé. I un reformé deplēgn le stüde de Sciënzes dla formaziun primara y le stüde de Laur Sozial. Al é sté da fá pié ia leziuns nöies, mudé i practicums, ciáfë dozēnc nūs y i.i. Prēsc n ann de laur unse albü por s'arjigné ca ala gran valutaziun da pert dl ANVUR, che é l'agentōra nazionale che acreditēia les Facoltés y i cursc de stüde. Dan dui agn ti ára toché ala Università da Balsan, y plü avisa ince a nosta Facolté y al

cursc de stüde de Sciënzes dla formaziun primara. Al é sté n gran laur da arjigné ca dūc i papiers y dōt ci che an messá mené a Roma. Spo él gnü i commissars, olache al é sté n'edema dēr intensiva. Ala fin unse stlüt jō cun la nota B, la secunda miú che an pó ciáfë. Al é la medema nota che ince la université Bocconi á ciáfë. Chësc nes ralegrēia tan deplü, deache i sun na université dēr jona y nia statale. Canche i ponsá spo che i esson n momēnt podü trá le fle, él gnü le corona.

**Le corona á trat sotissura dōt le monn dla formaziun, dala elementara ales universitēs. Co èise pa afronté chēsta desfida?**

I ultims mëisc é stá por nos na grandiscima desfida. Le pröm iade é la Università gnüda stlūta canche al é ciamó vacanze da carlascé. Al

é la pröma edema dl semester y dí ne se l'unse nia tuta sō, deache i minān che do n'edema foss dōt indó sté normal. Dedó él indere gnü dōt da n de al ater. Ai 4 de merz ales 8 da sēra nes él gnü dit che i ne podōn nia plü dauri. Le de do esson indere albü n gröm de leziuns. Te chē sēra y te chē nōt unse mudé te na forma telematica n gröm de cursc. I sun stá bogn da stlüt jō le semester zēnza che i studēnc ais pordü na ora de leziun. Chësc é sigü sté le maiú suzes tl ultim mez ann. Al é sté valch nia da pūch. Ti paisc todësc él ince sté caji olache n semester é gnü detlaré pordü.

**Co á pa funzioné la didatica a destanza?**

Nos un podü baraté debota sōn la didatica ince ciodi che i un na buna atrezadōra informatica. Dl ater vers sunse gnūs lassura che nia vigni studēt y dozēt á ince a ciasa n'atrezadōra informatica adeguada y l'internet aladó da fá chēsta forma de didatica. La didatica telematica nes á jové da spavēt por ji inant y nia tigní sō i studēnc, mo i sun dahunc da dí che chēra podará gní na situaziun normala. Ió n'ó assolutamēnt nia che chēsta devēntes la normalité. I un odü tler che al fala le contat cun i professurs, le contat di studēnc danter èi; imparé n lingaz dan da n computer ne vá nia. Chēstes é dōt esperiēnzes che á caraterisé l'ultim mez ann de ativité.

**Á pa chēstes esperiēnzes ince condizioné le plan, i traversc che i ti Èis metü dant al Consēi d'Università, por Osta candidatōra a degan?**

Te vigni caje messunse ester arjigné por le dagní cun le «corona». Por da d'altonn unse messü s'organisé cun la didatica y les destanzes. I ne podun nia adoré vigni local, i ne podarun nia lascé ite dūc i studēnc tl medemo tēp y i.i.. L'ativité tla Facolté post-corona é sēgn le gran laur da fá a nivel aministratif. Ió speri che la situaziun s'apajēies ia, ch'i podunse trá nostes esperiēnzes positives. I un odü che val' cosses funzionēia bun cun chēsta didatica.

De un n vers unse odü che la partezipaziun ales leziuns é plü grana, mo de l'ater vers, ti laboratori, olache al é da lauré cun le professor, messunse ji zoruch pormanche ara vá ales ativitēs de presēnza. N esperimēt odü sōn computer o n esperimēt fat instēs é dōes cosses desvalies.

**Ciugn é pa i traversc prinziapai che i Ves tolēis dant te chisc proscims agn?**

Nos sun la Facolté plü grana dla Università, porchël oressi la svilupé inant: che al vëgnes na gran facolté de sciēnzes umane y soziales. I oress ince ti baraté l'inom, mo plü che l'inom oressi che i contegnūs cūres veramēnter i gragn seturs umane y soziales. I oress fá pié ia almanco n curs nū, i oress amplié le curs de dottorat y n'avēi n secundo – poscibilmenter tl ciamp dla linguistica. Inant oressi stlüt jō les cherdades de professurs, olache i un tres ciamó val' seturs olache al nes fala le dozēt intern, ince sce ti ultims trèi agn n'unse cherdé veramēnter trōc.

**Co éra pa dal punt d'odüda strutral?**

La Facolté é chersciüda dēr dassēnn. Le frabicat a Porsenü é gnü fat inlaōta canche i ān chi 120 studēnc, sēgn n'unse 1.700. Porchël unse debojēgn de plü lerch. A nivel general oresson devēnt na Facolté sostenibla y chësc reverda dōt: chiló ne miní nia ma evitē plastica, mo ince che dōtes les propostes che i fajun por le teritore, dess ji te na direziun sostenibla. I orun contribuí ince a nivel scientifich da smendri nosta pedia ecologica. Nos formun dūc i insegnanc y ince chi che laora tl sozial. Chi che é sēgn studēnc sará n bel de maestri de scora y scolina. Sce bele èi á la sensibilitá por les chestiuns de n monn sostenibl, se fajarán plü sauri da la trasmēte, deache a chēsta tematica ne i sciampunse nia plü.

**Na ultima domanda: ci traversc Èise pa por la seziun ladina, de chēra che i sēis y restēis inant diretur?**

Sambēgn che al me stá tres a cōr dōt ci che taca adöm cun la seziun ladina: proiec sōle ladin, le laur scientifich, mo ince la formaziun de na bona classa de insegnanc ladins, che capēsc y vēiga ite l'importanza dl ladin. Dal momēt che i ne podun nia plü ester sigüsc che le ladin sides y vëgnes baifé indlunch te familia, él ince la scora y scolina che mëss se surantó chēsta inciaria. Cina dan da pūch gnól insigné ladin tla condiziun che plü o manco dūc i scolars è ladins. Chësc n'è nia plü insciō y porchël unse debojēgn de na didatica nöia. Ince a nivel de université sunse tl laur da porté ita na reflēsciun sōn co insigné le ladin sciōche secundo o ince terzo lingaz.

*Intervista Pablo Palfrader*